

**UREDBA**  
**O cijeni mjesečne karte za prijevoz nezaposlenih osoba u javnom gradskom prijevozu na području Kantona Sarajevo**

**Član 1.**  
**(Predmet Uredbe)**

Ovom Uredbom propisuje se pravo na mjesečnu kartu nezaposlenih osoba za prijevoz u javnom gradskom saobraćaju na području Kantona Sarajevo, uvjeti i način ostvarivanja prava, finansiranje, postupak za ostvarivanje prava i izbor davaoca usluge prijevoza.

**Član 2.**  
**(Korisnik prava)**

Pravo na prijevoz u javnom gradskom saobraćaju iz člana 1. ima nezaposleno lice sa prebivalištem ili boravištem na području Kantona Sarajevo, a koje se vodi u evidenciji Javne ustanove „Služba za zapošljavanje Kantona Sarajevo“.

**Član 3.**  
**(Pravo na mjesečnu kartu)**

Licu iz člana 2. obezbjeđuje se mjesečni kupon za prijevoz javnim gradskim saobraćajem i to sa ličnim učešćem.

**Član 4.**  
**(Cijena karte)**

Cijena karte javnog prijevoza putnika za kategoriju lica iz člana 2. Uredbe utvrđuje se u iznosu od 12,00 KM mjesečno.

**Član 5.**  
**(vrijednost PDV)**

Porez na dodanu vrijednost (PDV) uračunat je u cijenu mjesečne pretplatne karte iz člana 4. ove Uredbe.

**Član 6.**  
**(Način ostvarivanja prava)**

(1) Pravo na kupovinu mjesečne karte iz člana 3. ove Uredbe nezaposleno lice ostvaruje na osnovu ličnog zahtjeva, izjave ovjerene od strane nadležnog organa, ovjerene fotokopije kontrolnog kartona o javljanju nezaposlene osobe JU „Služba za zapošljavanje Kantona Sarajevo“ (u daljem tekstu: kontrolni karton) i lične karte.

(2) Sadržaj izjave iz stava (1) ovog člana posebnim aktom propisuje ministar saobraćaja Kantona Sarajevo (u daljem tekstu: ministar).

**Član 7.**  
**(Način provjere prava)**

(1) Na osnovu dostavljenih dokaza iz člana 6. ove Uredbe prijevoznik vrši provjeru statusa nezaposlene osobe kod nadležne službe JU „Služba za zapošljavanje Kantona Sarajevo“.

(2) Način provjere statusa iz stava (1) ovog člana posebnim aktom propisuje ministar.

**Član 8.**  
**(Postupak ostvarivanja prava)**



(1) Lice iz člana 2. Uredbe dostavlja prijevozniku zahtjev, izjavu ovjerenu od strane nadležnog orgna, ovjerenu fotokopiju kontrolnog kartona i fotokopiju lične karte.

(2) Prijevoznik određuje termine prodaje kupona i o tome daje javno obavještenje.

(3) Preuzimanje kupona lice iz člana 2. vrši lično na punktovima koje odredi prijevoznik.

(4) Prijevoznik je dužan dostaviti Ministarstvu saobraćaja Kantona Sarajevo (u daljem tekstu Ministarstvo) spisak korisnika sa podacima i dokaze iz stava 6. ovog člana.

(5) Spisak korisnika sadrži sljedeće podatke: ime i prezime lica koje je ostvarilo pravo na prijevoz, broj lične karte i broj iskaznice.

(6) Kao dokaz za izdati kupon prijevoznik dostavlja Ministarstvu fotokopiju kontrolnog kartona na kojoj je upisan broj iskaznice.

#### **Član 9.**

##### **(Način korištenja prava)**

(1) Za vrijeme vožnje lice iz člana 2. uz mjesečnu kartu za prijevoz nezaposlenih osoba dužno je imati i kontrolni karton i isti je dužan pokazati na zahtjev kontrolora, ili vozača prilikom ulaska u vozilo.

(2) U slučaju da se utvrdi korištenje datog prava suprotno odredbama ove Uredbe, lice za koje se utvrdi nepravilnost gubi trajno pravo na ostvarivanje prava na mjesečnu kartu za nezaposlene osobe za prijevoz u javnom gradskom saobraćaju na području Kantona Sarajevo.

(3) Za lice za koje se utvrdi korištenje datog prava suprotno odredbama ove Uredbe, prijevoznik koji utvrdi nepravilnost obavezan je pismeno obavijestiti Ministarstvo o istom.

#### **Član 10.**

##### **(Izbor davaoca usluge prijevoza)**

Pravo na prijevoz iz člana 3. ove Uredbe korisnici ostvaruju kod svih privrednih subjekata koji su registrovani za obavljanje javnog gradskog prijevoza i koji imaju registrovane linije za obavljanje javnog gradskog prijevoza na području Kantona Sarajevo.

#### **Član 11.**

##### **(Ravnopravnost spolova)**

Odredbe ove Uredbe odnose se podjednako na lica muškog i ženskog spola, bez obzira na rod imenice upotrijebljene u tekstu ove Uredbe.

#### **Član 12.**

##### **(Stupanje na snagu)**

Uredba stupa na snagu narednog dana od dana objavljivanja u „Sl.novinama Kantona Sarajevo“, a primjenjivaće se od 01.11.2015. godine.

**P R E M I J E R**  
**Elmedin Konaković**



web: <http://ms.ks.gov.ba>  
e-mail: [ms@ms.ks.gov.ba](mailto:ms@ms.ks.gov.ba)  
Tel: + 387 (0) 33 562-058, + 387 (0) 33 562-059  
Sarajevo, Reisa Džemaludina Čauševića 1

